

重修兩淮鹽法志

兩淮鹽法志卷七十四

督銷門

鄂岸督銷

下

同治五年正月湖北督銷局道員黃家駒等詳據職員羅慶餘等稟稱碱鹽一節向係平江崇陽兩縣於入山採茶之時銷市頗好頃聞到岸碱鹽約有四萬包之譜恐一時未免滯銷之虞見查湖南各岸遇有碱鹽及下色鹽准商民一律開煎提色其色與川鹽無異其價亦與川鹽相埒足以抵銷川鹽因思荆襄德安安陸等府向來銷售呂四真梁邇來真梁到漢甚稀以致引地多爲

川鹽侵占可否倣照湖南辦法准予開設亭竈或在漢鎮或在南岸嘴地方如遇碱鹽及下色鹽飭令另行開煎提色火伏亦照場亭辦理煎就之鹽由局換給水程運赴上五府行銷一以補場鹽之所不及一以抵銷川鹽免致侵占引地等情職道查碱鹽及下色梁鹽開煎提色卑局無此章程應詳請批示經鹽政李鴻章批查碱片鹽斤前據該局詳明另輪挨售專銷崇陽通山通城三縣下色梁鹽已禁止不准行楚各在案所請開煎提色湖南並無此章程且鹽已到岸另再重煎易啟售私之弊斷難准行

謹按在鄂岸重煎易啟弊端後有商販同福祥稟同
前由亦經批駁不行

同治五年二月鹽政李鴻章批湖北督銷局稟鄂省准鹽
釐課改章售見一案查鹽行放欠積弊極深疊經本署
部堂批令該道力持定見售賣見銀茲據稟於新正開
稱之日起改定章程一律見兌局中收付銀兩定以時
刻漸有條理所辦極好此後商本無虧負之虞鹽行免
攤賠之累釐課速清於餉需亦有裨益惟所稱水販買
鹽後予以一二日之限繳清釐課方許填發水程值此
改章伊始不能不少加體恤將來總須辦到銀鹽兩交

本日售鹽卽於本日兌價方能歷久不敝其各子店亦應仿照總局概賣見銀隨售隨解至銀兩歸局收付事務較繁自應添用員友所需薪水伙食等項應在局用項下開支勿庸商販捐繳致貽口實

同治五年四月鹽政李鴻章批湖北督銷局詳商販吉興祥轉運碱鹽一案查鄂岸碱鹽專銷崇陽通山通城三岸本係另行挨輪旣據完繳全釐准其轉運該三岸銷售應於水程內註明行銷碱鹽口岸不准隨地散售致滋流弊

同治五年十月鹽政李鴻章札行湖北督銷局訪聞該局

改收見課後鹽行暗中播弄賣鹽了畢僅以見銀完繳
官釐其商本商息仍立期票從前行票由局發商水販
不知孰爲釐孰爲課統名官項不敢逾期偶或稍遲亦
止數日半月今旣知官釐已繳所欠歸商變官欠爲私
債任意拖延鹽行不免挪移局中置之不問以致商販
暗受虧折加以銷數疲滯非一年半載不能挨賣攔本
太久無利可圖竟有各圖脫身不辦後運之勢要知設
局以督銷爲重若止收釐爲事則派一提課委員卽可
了事何必大員設局此收課之弊實關全淮大局該局
宜亟籌議者又據該道議稟售見章程鹽行本請以五

日爲限該道猶恐有延挨之弊酌定一二日內繳清方許填發水程復又重立章程凡鹽行繳銀以本日亥刻爲斷過時議罰凡客商領銀以第二日辰刻爲斷不准逾限定章何等嚴密茲仍以五日爲期辦理已形鬆動至商本與課釐並無二致乃竟任用店鋪印票鹽行並有尾欠其復蹈拖欠故轍毫無疑義無怪運商嘖有煩言目前軍餉萬緊釐課固刻不容緩其商本爲轉輸要款有本運鹽方有釐課可收豈容各鹽行巧爲播弄任意拖延仰卽將印票尾欠兩項出示禁革仍照定章一律售見

同治五年十一月湖北督銷局道員黃家駒詳准皖鹽招商局咨開上年十月閒皖岸引鹽斷市五日適鄂岸票商厚昌公辦運楚鹽七票經過大通停泊河下卽經援案截留該商引鹽接濟皖食於十一月奉爵署督鹽院李批開見據金陵掣驗卡呈報十月上旬已過鹽二千五百引不日卽可抵岸慎勿再截他岸之鹽致紊定章至楚岸七票應於運到皖鹽內如數撥還具報諭令楚商執持原運護照運往本岸銷售毋庸請票歸還職道查敝局上年皖鹽斷市曾經截留該商引鹽七票接濟岸銷嗣以皖商鹽船陸續到岸卽將截留票內動借楚

鹽一票計五百引共四千包合撥還皖鹽四票零一百六十包其餘所載六票未經借銷仍飭該商運往本岸銷售所有已經動借楚鹽一票應卽在於運到皖鹽內如數撥還比因該商所辦楚鹽係提尖白色而大通向銷中鹽未便撥還該商亦情願等候白色之鹽再行清結此款茲查有商販王興隆等運到皖鹽四票鹽色較白計三千八百四十包仍由皖局另撥輪鹽一百六十包合共四千包卽飭如數撥還楚商厚昌公借銷之款並請於該商運鹽到岸時先行提銷等因乞示飭遵經鹽政李鴻章批此票厚昌公截留之鹽在皖岸借銷係

多得一檔之利已較他商便宜且皖岸前曾借銷西鹽招商局詳請提輪經曾爵閣部堂批駁有案所有撥還厚昌公楚鹽仍應照岸先後挨輪不准提售取巧

同治五年十二月湖北督銷局道員黃家駒等詳奉北爵撫憲曾批據漢陽縣詳商販正祥裕振興公永茂萃等稟請添造福昌萬福來永茂隆堆棧一案當批查漢岸添造鹽倉原爲慎重鹽斤起見旣據稟明督銷總局自應准其起堆惟各販鹽斤一經起坡散漫難稽而盜賣私售之弊亦不可不防嗣後如有盜賣鹽斤私售滷水等弊應如何設法稽查酌量示罰之處仰鹽法道會同

督銷局妥議章程等因遵查淮鹽商棧詳奉批准卽行
委員專司稽查並派局友駐棧經理原杜國私盜賣之
弊各棧涵水節經示禁如有破包涵水概令掀撥河內
不准私售在案見擬再行照案剴切出示曉諭並取各
該棧不致售私切結存卷如有私犯或被查出卽照所
售價值加十倍議罰經鹽政李鴻章批允

同治六年三月湖北督銷局道員黃昌輔申報崇陽通城
通山等縣係屬淮綱引地向銷碱片安鹽早經示諭招
販赴漢買食嗣因水販貪食川私而赴漢買銷者甚屬
寥寥存岸碱片守輪日久課本因之久擱不得不變通

辦理故於上年冬閒挨輪先後選撥安鹽四百餘引派委候補未入流鄭維周攜帶水程督同本商陸續押運該三縣會同地方官設法分銷並不准販戶把持續運接銷之鹽漸次融銷辦理稍有成效此係商人自運請員經理局不墊價亦不給費又查北鹽行銷較滯德安一帶可銷又爲潞私侵占前已由局先後提撥三百餘引飭委提舉銜候補布庫大使魏慶祺押運雲夢等處會同地方官認真督銷以冀蔽私近因該處捻氛逼近銷行尙未暢旺因將提撥安鹽北鹽分別委員押運督銷緣由報明查核經鹽政曾國藩批允

同治六年三月鹽政曾國藩批湖北督銷局稟昨據湘局具稟北鹽於湘潭一路尙屬合銷該商蕭怡豐以鄂局存積北鹽過多銷數甚滯請將臨檔北鹽融銷湘岸仍以續運湘岸南鹽留鄂抵售尙屬一舉兩得應准照辦同治六年七月鹽政曾國藩批湖北督銷局稟查鹽船重斤過一斤以外免提半斤津貼船戶於本年三月閒批准通行在案所有前經各卡註明護照到岸未售之船應准一律減提以昭公普惟津貼船戶祇准以半斤爲率其重至二三斤以外亦祇准免提半斤其餘仍須全數充公並非加提半斤餘可概免切勿誤會

同治六年十一月鹽政曾國藩札湖北督銷局准鹽售銷
極滯固因川私充斥徧地侵灌亦因銀價日昂水販成
本加重鹽行又多方欺勒以致販戶裹足課餉日絀見
經本部堂派委前署運司程道赴漢整頓亟宜設法平
價以廣招徠查鄂局售鹽除定價外每百斤另收緝私
公費四分名爲鹽道巡緝之用其實緝私各卡緝費皆
由督銷局在於局用內支給况鹽道每月已由局中支
送薪水銀四百兩足敷辦公未便再增緝費又每百斤
另收陸課錢二百文合銀一錢二三分准鹽行銷鄂省
每引已完鄂釐二兩四錢爲數已鉅亦未便再增陸稅

以上兩款均應一律裁除以輕販本至行用每百斤收銀一錢五釐係照三分定例暫准照收其餘行中一切浮費應查明概行革除此後售鹽均應歸局收價由行過鹽行用亦由局收局發各鹽行止許招接水販不准私相貿易如敢把持不遵局規卽由該道稟請押閉

同治六年十一月鹽政曾國藩札湖北督銷局武穴地方爲准鹽入鄂門戶刊章內本係敘明應設分局嗣恐兩局分銷難以保價故未設立茲查淮鹽行銷江西在於吳城設有分局辦理數年便商疏銷頗著成效其湖北武穴亟應倣照設分銷淮鹽局由程道派員專管一切

章程悉照鄂局辦理以廣銷路

同治七年正月湖北督銷局道員程桓生詳奉札近因銀價日昂水販裹足應減各局售價以廣銷路見經酌定鄂湘西三岸每百斤減去三錢定售三兩二錢皖岸減去二錢定售二兩八錢所減之價在運商應得本利內扣去一半各局應解金陵鹽釐內扣去一半將來銀價如跌至一千五百文以內當隨時酌復等因查鄂岸引鹽見歸局售定議連皮按六百斤爲一引釐稅照此扣解不計餘斤茲奉飭減每百斤售價三錢是六百斤應減一兩八錢商本釐金各半扣減本屬公平惟釐款祇

按正引作計而商之本息須連餘斤合算不無派認較多且慮帳目繆輻擬請於應解金陵釐款內按照正引核減一兩餘於運商本息項下無論正引餘斤概令派認庶界限畫清而帳目亦易結算爲運商計亦可稍資津貼經鹽政曾國藩批正引減去售價餘斤自應照減惟餘斤內所減之價全歸商認未免運商受虧據請在於金陵釐款內按照正引額減一兩餘於運商本息項下派認是每引應解釐款僅照原札多減一錢而於商不無小補且帳易核算應准照行湘西二岸亦應照此辦理皖岸正引祇減二錢餘斤所減亦少况皖商獲利

稍厚其餘斤內所減之價應全歸商認不得援以爲請
同治七年二月湖北督銷局道員程桓生呈武穴分局章
程 一漢岸存鹽每票撥二成運赴武穴發給護照以
二月初一日起至月底止先儘舊鹽按到鎮之先後挂
號挨輪出售三月初一日以後遇有新鹽運到卽挨次
挂號仿照吳城章程三七分派以三成留武七成歸漢
以昭畫一 一鄂岸丙寅秋綱奉札定於二月十六日
開辦查丙寅春綱之鹽將次運竣計未到岸者無多新
鹽開江到岸至速須在三月底如武穴銷市果旺前提
之二成不敷濟銷仍擬再提二成接濟屆時斟酌辦理

一漢局售鹽除定價外收取三分行用查武穴有鹽行四家如仿照吳城分局章程自應不收行用祇給各行按所繳帖本由局每月津貼三分利息局中售鹽一切事宜概不令其躡越惟漢武相距四百五十里武穴不收行用則售價太輕勢必漢局銷市盡趨武穴似非持平之道且黃州所屬一帶大半爲淮南北私鹽侵占茲旣設立分局卽須辦理緝私此項費用亦應籌畫擬於售價外每引收銀三錢較漢局行用將及減半所收之項一以爲津貼各鹽行利息一恐局用不敷藉資挹注一則預爲辦理緝私經費庶銷路不致偏枯而公用

亦有所倚賴矣 一武穴瀕臨大江向爲泊船碼頭查
武穴上五里有五里港又上五里有老鼠夾均可泊船
惟相離較遠友人過稱於水販領鹽照料一切均不甚
便見在運到之鹽已陸續灣到武穴詢之各商船均尙
以爲穩妥自可無庸移動惟水勢漲落不時風波起發
無定仍飭饒牧隨時酌察情形如果不便再令移至五
里港地方另派座船一號派令司事友人駐彼辦理至
田家鎮地方雖便於泊船而市鎮蕭條屋宇狹隘斷不
宜於設局魏道前稟局設該處應無庸議 一分局每
日所收銀兩存局過多殊不放心擬隨時寄放舟中已

稟請咨商彭部堂派令駐劄武穴礮船時加防護一
各商在分局所售鹽斤一切帳目均歸總局結算其到
鹽售鹽均按旬專差報由總局轉報悉照吳城分局辦
理經鹽政曾國藩批第一條擬撥漢岸存鹽運赴分局
發售俾從前到輪之鹽不爲新鹽所壓辦理極是惟所
撥每票僅祇二成尙嫌其少該道於第二條內聲明如
武穴銷市果旺仍擬再撥二成尤足以昭公允其新鹽
准自三月初一起三七分派至輪次統應歸在舊鹽之
後俟先後所撥舊鹽售竣再售新鹽商販自無異說第
三條武穴鹽行四家擬按所繳帖本由局津貼三分利

息不收行用係仿吳城分局章程准其照辦惟昨據皖局李守具稟深恐武穴售價太輕倒灌皖界業經批減鹽河華陽兩卡之釐以杜彼此互侵况相距漢局亦近該道又恐分局價輕漢市盡趨武穴亦不可不預防其漸該分局行用一款自宜仍照漢局每兩徵收三分除津貼鹽行利息外餘銀概歸局用報銷庶徵妥協第六條所請防護礮船業准彭部堂咨復札飭中營彭營官酌撥前往其餘各條均屬周妥悉如所議辦理

同治七年二月鹽政曾國藩批湖北督銷局稟查黃道提撥子店之鹽前經李署部堂於五年十二月內批令不

准擅動川稅墊發商本是墊項早經停止其商鹽撥存子店者與存漢待銷事同一律何以漢局商本可減而子店商本獨不可減耶所稟殊屬含混各子店應照漢局每引減價一兩八錢除扣釐金一兩其餘統歸商本核扣以昭畫一見祇存鹽二千三百餘引卽會催各委員趕速出售不准再任稽延致干參辦

同治七年七月鹽政曾國藩批湖北督銷局稟據稟籌辦樊局章程第二條運樊之鹽多費水腳辛工等項自宜提增售價以貼商本既據酌中核定每百斤照真梁定價加售四錢民間尙無食貴之嫌應准照辦第三條樊

城所開鹽行既無部帖由局開售之鹽自可無須收取
行用其運往他處水販有由鹽行經手者取用數目亦
宜由局酌定榜示免致高下其手之弊第七條襄陽同
知通判二員向領薪水俟潞課局撤後准由鹽局按月
照給以資津貼第九條自漢至樊沿途灘險溜急挽運
既艱應飭各商趁水落歸槽之時多運頂梁上鹽預爲
儲備免致春水發生有脫檔之慮

謹按八年商人萬順和請專認襄樊一萬引不入歲
額經鹽政馬新貽批查襄樊均係行票之地非湘岸
辰州專食碱片可比見經堵緝潞私並在樊城設立

督銷分局原冀推廣銷路疏通額內之引何能別樹一幟所請斷難准行

又按樊城整頓新岸在漢各商皆以道險程遠不願運往始爲通岸勻派凡有一票小商皆酌提成數商人倪吉升等稟求免派亦經鹽政批駁

同治八年九月湖北督銷局道員程桓生詳奉札該局局用從前酌定用款本屬寬裕見值禁堵鄰私各路增設巡卡費用日繁尤宜力加撙節嗣後祇可於定章之中核實支銷未便於定章之外再行增益如實有必須動用之款應先行稟請核示再行支發等因遵查漢局局

用自上年正月職道接辦起照各前局分別增減曾經
開具清摺稟呈旋於武穴設局分銷亦將支用一切開
摺報查迨樊城添設分局適值職道丁憂交卸前代辦
局務鍾道因查該局用款核與武局有減無增遂循舊
按季報銷均蒙批示在案當漢局接辦之初每念局用
浩繁按引取費三錢深恐人不敷出除功鹽重斤變價
循舊入於局用造報外所收三分行用按月止照大引
發給各行具領並將武局每引扣收行用三錢亦祇按
各行戶帖本給與三分之息以上餘賸之項酌定悉歸
局用緝私等項支銷俾資接濟是以截至本年夏季爲

止漢武兩局除支共尙餘存銀七千餘兩此外樊局開辦建倉等項費尤不貲職道慮其銷市不暢局費無多於稟報設局情形案內卽將不敷之項擬由漢局貼補今截至六月底止共透支銀二千五百餘兩又續添置一倉計錢一千一百三十七千一百八十三文合漢平銀七百七兩三錢二分八釐容由卑局於秋季造報撥給具領彌補清款以免虛懸見在武樊兩局支數均仍其舊此後亦少額外添支之款新設川淮配銷局尙未開辦其局費尙難懸揣此後如該局不須貼補則祇樊城一局費用不敷以漢武兩局之贏餘挹彼注茲尙堪

支柱惟卑局地當衝要事務較繁常支之外時有活支
茲奉前因謹擬將總分各局用費定以限制目前局用
均有大數可稽漢局用款月共需銀二千四百兩以內
又緝私經費等項計共需銀七百八十兩之譜以後遇
有添卡裁卡之處隨時稟報武局月共需銀八百兩以
內樊城連倉費在內併計月共需銀約七百兩嗣後各
局用款請卽以此數爲率遇端午中秋年下三節需加
犒賞酒席各費亦祇准照向例核實支銷不得較前格
外多支至卑局遇有隨時支動之款應待具稟請示者
卽候示遵行或不及待稟請者仍一面動支一面具報

經鹽政馬新貽批准

同治八年九月鄂商倪吉升等稟稱近因沙市搭銷二成
淮鹽樊城整頓新岸在漢各商皆不願往經督銷局委
倡爲通岸勻派有一票者酌提成數由各商自備水腳
運往沙樊兩處候銷誠爲通力合作至公無偏之舉惟
商力大小不同逆流上駛一月方能到岸該兩處爲川
鹽潞私盛行之地淮鹽色質較遜必致滯攔爲此叩乞
札飭運司及督銷局免其勻派經鹽政馬新貽批沙樊
設立兩分局不歸水販而歸商販正爲開拓銷路敵川
暢淮起見該商等皆宜多運真梁上色踴躍前往方是

自強之計乃因督銷局派提成數輒以路遠力薄爲詞
先自畏縮無怪川鹽恣意橫行况通綱勻派尤不能爲
一二小商開端邀免致啟效尤所請礙難准行至沙局
定價真梁每百斤定售三兩五錢四分並無七折之說
仰卽遵照

同治九年五月湖北督銷局道員程桓生稟樊城設局分
銷淮鹽當慮銷數不暢局費不敷酌於漢武局費項下
撥貼上年奉札撙節支銷復定每月支用不得過七百
兩本年又請減輕售價以疏銷路各在案詎自減價以
來銷市仍滯應收局費實屬寥寥茲據該分局委員相

恩祚稟請裁減員友司事勇役開摺前來每月約可省銀二百餘兩伏乞示遵經鹽政馬新貽批該局銷數疲滯局用支絀據請裁汰員友所辦甚是所有津貼襄陽同知通判之項亦應暫停至裁減司事友人酌給一月薪資以貼盤費

謹按襄陽同知津貼一項嗣經該同知許繹稟陳辦公拮据懇乞照舊給發鹽政批允仍月給四十千文同治十年八月運商義利生稟許鹽行把持亂檔卡價一案鹽政曾國藩批飭湖北督銷局核議詳辦十月督銷局道員程桓生等稟查鄂岸售鹽自同治七年改由卑

局設櫃收納見銀須繳一引之價方發一引之鹽原所以杜搶跌放期等弊嗣於九年八月訪聞運商與鹽行私減售價卽經分別諭禁不止一次今義利生等具稟鹽行把持任意出入私跌放期萬難行銷卑局查鹽務以保價爲本最忌搶跌而放期卽開倒騙之漸關係大局惟鹽由局售價由局收非各該商自願私行跌價放期斷不能強之使跌使放此一定之理據鹽行鄂恆春等十戶具稟上年因搬水搶售間有售賸殘檔爲數無多或色質低次或包索破爛本商自願認貼行戶從未沾潤又據運商義利生等十一戶具稟跌價放期實係

搬水之鹽包索破爛致各行戶不能招販乞寬其既往
各等情並各呈切結前來卑局復通諭鄂岸運商如再
有跌價放期等弊查出果係鹽行把持卽嚴辦鹽行如
係運商急於搶售亦卽將該商稟請嚴辦以杜將來而
昭炯戒至近來漢岸正梁行銷疲滯各商每以正梁截
留武穴甚有留眞梁者以致存漢之鹽頂梁一色居多
眞正二色較少原稟內稱頂梁留武眞正二梁全行運
漢殊屬朦混所有派檔售鹽卑局向係按眞正頂三色
每包各開二號合以三色計共六號偶有一二售賸殘
檔隨卽飭行招販領銷俾免延擱且係由局經理其事

從不假行戶之手原稟內稱開至十號之多前檔未清
行戶催開後檔等語尤屬誤會該商等但知各行坐收
三分之利而於銷市疲滯不肯實力招徠怨望誠不能
免今既共相儆戒不敢復蹈前愆理合具文詳覆抑更
有請者見在運鄂鹽色實不如前真梁尤日見其壞運
商以真正二梁幾與頂梁相仿率混留武局藉以先銷
取巧而稱鹽者驟難辨別轉致運漢岸者和鹽居多尖
鹽益少殊於銷路有礙應請嚴飭各場講求煎煉真梁
場尤須整頓以冀鹽色一律潔白庶疏銷較有把握經
鹽政曾國藩批准完案並飭運司整頓鹽色

同治十一年五月湖北督銷局道員程桓生稟樊局銷數
自三四月以來日見其疲本月上旬僅售二十餘引幾
有顆粒不銷之勢用款萬分支絀况川鹽色質白潔足
與潞私爲敵民間無不樂食近來潞販多聞風裹足所
有原堵潞私之老河口卡雙溝卡應請一律裁撤其按
月津貼水師之小江口巡緝公費三十千文襄陽同知
公費四十千文亦請停止樊城分局應如何裁減移調
之處容再籌議經鹽政何璟批允

同治十二年十二月湖北督銷局道員程桓生稟樊城自
本年七月分界以來川鹽通行該分局淮銷日漸減少

卑局酌量變通躉零並售銀錢兼收定以見交不准帶欠迄今數月銷數仍屬無多雖爲川鹽占礙究未便遽行停撤應將分局改爲子店責成委員經理經鹽政李宗羲批允

同治十三年七月湖北督銷局道員程桓生稟遵札議撥湖北緝費擬在川稅項下動支一案奉批事屬可行准自本年五月起查照淮鹽銷數按月貼撥其淮釐項下前已撥過湖北緝費十四萬有奇係屬淮引正釐自應照數歸補仰於川稅餘款內分作數年歸款等因職道查卑局附收川鹽加稅一項同治九十年間每年收數

內江鹽法司卷之十四
約十五六萬兩迨十一二年每年收數僅十二三萬之譜按月解金陵善後局經費四千兩每年應解銀四萬八千兩又緝私各卡礮船經費每年約支銀二萬八千餘兩又此次奉發湖北緝費一款按准引撥貼每年約又二萬數千兩通盤籌算每年應共支銀十萬餘兩除以上各款支用外每年似尙可籌撥銀二萬餘兩歸還淮釐項外前撥湖北緝費之款計六七年間可一律歸清經鹽政李宗羲批允

謹按漢口督銷局於光緒元年二月經鹽政劉坤一批飭核實建造計屋門樓三座平房二十七間樓房

六十一間廂房二十九號走廊四十八號廁屋一所
門窗榻扇俱全共用銀二萬一千四百三十六兩有
奇又武穴分局張貴誠稟稱武穴濱臨大江水溜不
便泊船上水固不易行當春夏水漲時其難尤甚自
下塘口以上至洋關約一二里之遙水愈大流愈急
武鎮又無歲不遇大水大水時又惟下塘一處可以
停泊光緒二年六月由洋關至下塘口添設游纜一
道計長四百餘丈

光緒五年十二月督銷局道員程桓生稟鄂鹽報到向來派人赴河查驗該船實在抵岸挨次挂號輪銷惟遇船

到湧旺之時先後羈雜往往多所爭執擬派礮船一號
駐劄到岸處所查驗收取護照船倉編立號次按日呈
繳更爲核實查鹽船重載由江入漢進口則船多擁擠
江面又非駐船之所惟有在漢陽南岸嘴南關一帶駐
劄最爲相宜並於該處立竿懸旗書淮鹽運到鄂岸在
此挂號字樣以便鹽船遠望停泊大水時再行擇要酌
辦經鹽政吳元炳批允

謹按光緒六年後鄂岸督銷以添設營勇礮船緝私
爲急務另列緝私門而商情疲滯獲利薄而歷時久
與前時無異故不悉錄

光緒十年六月湖北督銷局道員程桓生呈擬各州縣按
年認銷引數責成地方印官幫同緝私嚴定功過一案
經鹽政曾國荃批據詳緝私章程於鄂岸情形瞭如指
掌詳見緝私篇所議考成暫歸外辦因從前原額今昔不同
特就近年銷數因時制宜簡便易行並不強鄰省牧令
以所難至州縣之勤惰固不能專視獲私之多少而緝
獲大夥究屬首功宜以多獲爲主參以鹽案是否顧問
營卡是否聯絡三者互證更覺周而仰候咨會湖廣督
部堂湖北撫部院分別通飭遵辦

武昌府屬

江夏縣

額行十萬六千二百五十引

光緒七年分有閏共銷六千七百六引半八年分無閏
共銷六千一百八十八引一分九年分無閏共銷六千
一百九十引二分議飭每年有閏認銷七千六百引無
閏認銷六千九百引

武昌縣

額行八千五十引

光緒七年分有閏共銷九千九百十六引八年分無閏
共銷八千六百七十七引九年分無閏共銷八千三百
九十三引三分半議飭每年有閏照七年分銷數無閏
照八年分銷數不得欠絀

嘉魚縣

額行一萬四千九百七十引

光緒七年分有閏共銷二千二百引六分八年分無閏
共銷一千八百八十引八分九年分無閏共銷一千七
百三十二引八分議飭每年有閏認銷二千四百四十
引無閏認銷二千二百四十引

蒲圻縣

額行一萬一千七百五十引

光緒七年分有閏共銷二千三百八引七分八年分無
閏共銷一千七百六十一引四分九年分無閏共銷一
千八百十五引半議飭每年有閏認銷二千四百六十
引無閏認銷二千二百五十引

咸甯縣

額行五千六百四十引

光緒七年分有閏共銷四千一百五十四引六分半八年分無閏共銷三千五百十一引九年分無閏共銷一千一百三引半議飭每年有閏認銷四千三百引無閏認銷三千九百引

崇陽縣

額行五千六百四十引

光緒七年分有閏共銷八千五百六十四引八分八年分無閏共銷八千六百八十三引九年分無閏共銷八千九百二十三引九分議飭每年有閏無閏均照九年分銷數不得欠絀

通城縣

額行四千八百五十引

光緒七年分有閏共銷三千三百七十四引半八年分
無閏共銷二千八百八十九引九年分無閏共銷二千
八百三十三引議飭每年有閏認銷三千六百引無閏
認銷三千三百引

興國州

額行九千六百六十引

光緒七年分有閏共銷九千五百三引八年分無閏共
銷八千三百九十二引半九年分無閏共銷七千十八
引半議飭每年有閏認銷原額九千六百六十引無閏
認銷八千七百六十引

大冶縣

額行六千四百五十引

光緒七年分有閏共銷八千五百三十二引半八年分無閏共銷七千二百九十五引半九年分無閏共銷六千五百四十六引議飭每年有閏照七年分銷數無閏照八年分銷數不准欠絀

通山縣

額行三千八百七十引

光緒七年分有閏共銷三千四百五十五引半八年分無閏共銷三千九百二十引半九年分無閏共銷二千八百七十五引議飭每年有閏認銷三千七百引無閏認銷三千三百引

漢陽府屬

漢陽縣

額行八萬三千七百引

光緒七年分有閏共銷一萬一千七百九十引五分八年分無閏共銷一萬七百八十七引一分九年分無閏共銷一萬八百八十三引六分議飭每年有閏認銷一萬二千七百引無閏認銷一萬一千九百引

漢川縣

額行三萬二千二百引

光緒七年分有閏共銷三千六百五十二引八分八年分無閏共銷三千五百二十八引六分九年分無閏共銷二千七百十一引提運售銷一百九十引共二千九

百一引議飭每年有閏認銷四千引無閏認銷三千六百引

孝感縣額行八千六十引

光緒七年分有閏共銷五千五百七十一引八分八年分無閏共銷五千八百三引六分九年分無閏共銷五千七百八十六引一分提運售銷一百七十引共五千九百五十六引一分議飭每年有閏認銷六千七百引無閏認銷六千一百引

黃陂縣

額行八千五十引

光緒七年分有閏共銷一萬六百六十一引二分八年

分無閏共銷八千七百七十七引九年分無閏共銷七千三百七十七引九分提運售銷五百十五引五分共七千八百九十三引四分議飭每年有閏照七年分銷數無閏照八年分銷數不准欠紬

沔陽州

額行五千六百三十引

光緒七年分有閏共銷三千四百九十七引八年分無閏共銷三千三百七十三引二分九年分無閏共銷三千六百三引議飭每年有閏認銷四千三百引無閏認銷三千九百引

安陸縣

額行七千一百引

光緒七年分有閏共銷二千一百三十四引七分八年分無閏共銷一千九百九引一分半九年分無閏共銷一千九百九十四引三分半議飭每年有閏認銷二千四百引無閏認銷二千二百引

雲夢縣

額行三千二百三十引

光緒七年分有閏共銷四千三百六十引五釐八年分無閏共銷四千二百九十引五分半九年分無閏共銷三千三百七十引議飭每年有閏照七年分銷數無閏照八年分銷數不得欠絀

應城縣

額行一千三百引

光緒七年分有閏共銷二千二百五十八引半八年分
無閏共銷一千八百八十八引八分半九年分無閏共
銷一千九百二十六引六分議飭每年有閏照七年分
銷數無閏照九年分銷數不得欠絀

隨州

額行并加丁共四千六百八十六引

光緒七年分有閏共銷二千二百九十三引八分半八
年分無閏共銷二千三百四十六引二分九年分無閏
共銷二千五百七十九引半議飭每年有閏認銷二千
九百三十引無閏認銷二千七百引

應山縣

額行并加丁共一千一百八十二引

光緒七八九等年未銷議飭每年有閏認銷三百引無閏認銷二百七十引

黃州府屬

黃岡縣

額行二萬四千一百五十引

光緒七年分有閏共銷一萬三千八百三十七引半八年分無閏共銷一萬二千七百六引四分九年分無閏共銷一萬三千三十六引一分議飭每年有閏認銷一萬四千六百引無閏認銷一萬三千五百引

黃安縣

額行四千八百三十引

光緒七年分有閏共銷一百三十七引八年分無閏共

銷一百七十九引半九年分無閏共銷二百四十三引
提運售銷三百十引共五百五十三引議飭每年有閏
認銷六百八十引無閏認銷六百二十引

蕪水縣

額行一萬六千一百引

光緒七年分有閏共銷三千五百八十六引半八年分
無閏共銷三千六百九十二引半九年分無閏共銷三
千七百九十四引半議飭每年有閏認銷四千五百引
無閏認銷四千引

羅田縣

額行四千八百三十引

光緒七年分有閏共銷一千五百三十九引半八年分

無閏共銷一千二百二十四引九年分無閏共銷四百六十四引提運售銷一百六十引共六百二十四引議飭每年有閏認銷一千六百引無閏認銷一千三百五十引

麻城縣

額行一萬一千二百六十引

光緒七年分有閏共銷二千二引八年分無閏共銷一千九百九十引九年分無閏共銷二千二百九十四引半提運售銷一千十引共三千三百四引半議飭每年有閏認銷三千七百引無閏認銷三千四百二十引

蘄州

額行一萬七千六百九十二引

光緒七年分有閏共銷五千七百十六引八年分無閏
共銷五千五百六十八引九年分無閏共銷五千一百
六十二引半議飭每年有閏認銷六千二引無閏認銷
五千九引

廣濟縣

額行一萬四千五百引

光緒七年分有閏共銷七千九百二十九引九分八年
分無閏共銷七千一百八十引四分三釐九年分無閏
共銷六千五百四十五引議飭每年有閏認銷八千二
百引無閏認銷七千五百引

黃梅縣

額行八千五十引

光緒七年分有閏共銷二千四百六十八引八年分無
閏共銷二千二百四十二引九年分無閏共銷二千三
百六十一引議飭每年有閏認銷二千七百五十引無
閏認銷二千五百引

謹按以上武昌漢陽德安黃州四府盡復淮引故責
成地方官認銷其餘川淮並銷者不在此列然近年
仍銷不足數則以認銷引數究非食岸包課比也

光緒十三年十二月湖北鹽法道惲祖翼督銷局道員楊
儒等稟襄樊一帶潞私侵灌川淮銷數均見短絀前職
道等派委勘查擬於兩河口蕭江口各設礮船呂堰驛

黑龍集孟家樓湖河鎮錢家崗各設旱卡詳奉批准分別派員辦理在案惟前項經費川淮兩局各半分籌於無可設措之中極力騰挪原所以力求整頓翼暢官銷務使功歸實濟款不虛糜是以原詳聲明仍視堵緝能否得力隨時體察情形稟請核實辦理查各卡試辦以來已經半載報獲私鹽甚屬寥寥深恐地非扼要人未相宜必致虛應故事經費徒糜不得不嚴密稽查以重緝務見經飭據川鹽局委員吉守淮鹽局委員周承會稟馬天佑等到卡以來前後情形察審訪確計於緝私難期實效亦於鹽務無所裨益緣襄鄖西北一帶潞私

之侵灌路路可通私鹽之窩固處處皆有且爲梟匪者多係地棍土豪而爲窩固者半屬刁生劣監其視緝私卡員固無懲創之權又無鉗制之力是以平時卽以包庇私販爲事每遇緝私者獲拏私鹽必糾黨持械攔劫傷人已成積習此卡員不能緝私之情形也況見在各卡員一知堵緝之維艱竟置本職於不顧專欲領鹽分賣擡價肥私所有報稱獲私實藉營汎所得之鹽塞責而已並非會同緝獲者卽各卡專解之鹽實私販所與之賄梟匪因之愈加藐視私鹽因之益見充斥彼各卡員猶自不知愧奮方且巧立名色貪取漏規或則遇事

索錢阻撓商旅或則按挑抽費賣放私梟此卡員無益
鹽務之情形也查歷來緝私之法惟林文忠督楚時以
緝獲私梟專責成於營伍以嚴懲窩匿專責成於州縣
曾著實效儼見今仿而行之嚴飭各州縣與營汛齊心
緝拏實力懲辦則較之緝私卡員聲威愈壯呼應尤靈
既不致擾民亦可節糜費矣如蒙俯允嚴札襄陽沿邊
各州縣卽此編查保甲之際申明窩匿私梟之禁並移
請提鎮飭下各營汛選弁派隊認真緝梟使境內無敢
包庇之人則私販自無駐足之地斯於緝私可臻成效
職道查今新設各卡旣不能實力查拏轉使營汛有所

下學堂志卷一
三
推諉甚至受賄包庇雖未確查實據難保必無總之人
地均未相宜辦理難期奏效月費薪糧盡歸虛擲當此
庫款支絀自宜隨事撙節擬將新設各卡一律裁撤以
節糜費經鹽政曾國荃批襄樊一帶新設堵緝路私各
卡既據查明未能得力應如稟一律裁撤以節經費以
後襄樊一帶緝務卽責成州縣營汛認真辦理

謹按鄂省向行淮鹽額引五十五萬六千八百餘道
今商人每年認運三百票每票五百引每引六百斤
計歲運僅十五萬引分春秋兩綱環運而三年僅銷
兩年之鹽以十年觀其通歲銷實數纔十萬引耳故

川鹽不止淮粟不可驟加斷斷然矣

兩淮鹽法志卷七十四

兩淮鹽法志卷七十五

督銷門

湘岸督銷

上

湘岸向行淮鹽二十二萬三百餘引見行章程惟澧州暫行川鹽其餘除例行粵鹽外淮南引岸業已全復商人歲認三百八票每票五百引每引六百觔計每年運銷十五萬四千引內平江碱片一萬二千九百引均銷不足約三年方竣兩年之鹽以十年觀其通計實銷僅十萬引耳其暢行時較勝於湖北亦無過十三萬引者票之不可再加也明矣志湘岸督銷

同治二年十一月鹽政曾國藩釐定淮鹽運楚章程八條

詳載票
法新章

謹按楚岸章程湘岸督銷局設長沙省城餘與鄂岸
同

同治三年十月湖南督銷局鹽法道鄭元璧等申自本年
七月十九開局之日起至八月底止經管支收鹽引銀
錢各細數分晰開造四柱清冊呈齎察核經鹽政曾國
藩批檢閱銀數細摺據將用款全數開列尙屬詳明但
旬報以售引收銀鍼孔相符爲主今查鹽摺內開省城
各鹽行分銷三千二百四十三引零並據聲明埽數銷

售無存以每引售價二十四兩核計應收正引銀七萬七千餘兩餘餉尙不在內銀摺內僅收二萬六千餘兩亦未分晰鹽釐商本又官運鹽本餘利必須另簿登記以便將來核算本利絲絲入扣至旬報引銀數目有關奏報頒去摺式一紙

摺式 計開

舊管

某年某月某日止除解支外實存釐稅各款庫平銀若干兩

新收

某年某月起至某日止售鹽若干引每引售銀若干兩共收釐

稅各庫平銀若干兩

開除

某月某日解某處鹽釐庫平銀若干兩

某月某日解九江關稅庫平銀若干兩

本旬給還商本庫平銀若干兩如係官運即寫給還官號本銀若干兩

本旬給商一分半息庫平銀若干兩如係官運即寫給還官號息銀

若干兩

本旬提局用庫平銀若干兩

實在

存釐稅各款庫平銀若干兩

以上均開正引數目涵耗包索餘觔均准貼商不必
開列官運將涵餘稱餘歸入餘利項下作收開報再
該局應自開局日起照式逐旬補開清摺呈送

同治四年四月湖南督銷局道員李明墀等呈報湘岸售
價平色銀餘等款解繳省局彙總報銷一案經鹽政曾
國藩批查湘岸售價每百觔售銀四兩據稱另收加平
及傾瀉工價銀二錢每引卽收一兩二錢加以涵耗包
索餘觔約計百觔再增二錢共收一兩四錢以每年運
行八萬引計算可得銀十一萬二千兩爲數甚鉅卽以

盈餘繳公而平色既無一定開銷必難核實流弊無窮
應行停止嗣後各局售銀應一律收庫平庫色方無參
差可由省局移取藩署庫砒仿製頒發色如低潮尤可
隨時剔換見在湘省銷數甚暢如果售價實可酌提所
提之價應遵刊章以七成充餉三成給商斷不可稍違
定章致貽商販口實仍將已收加平傾瀉銀兩造冊報
銷凡利之所在眾目環伺總須光明洞達使上下皆了
然於心了然於口免致迷離傳播別生波瀾江西督銷
局爲言官所糾而查辦毫無實迹者以平日恪守刊章
立於無過之地也吾湘亦宜妥慎圖之嗣督銷局覆稟

湘局應解撫院鹽道兩署公費差盤銀兩及泰州湘岸局費每包五分長沙湘潭岳州衡州常德益陽津市靖江各局一切用費原擬在於岸費暨平餘內核實開支今奉批飭自應遵照改收庫平庫色仍將從前所餘市平傾瀉銀兩截至本年二月爲止分別官運商運趕緊造冊報銷所有一切局用暨義舉公費等項統於每引局費三錢內撙節開支如值鹽引滯銷不敷動用擬於官運溢鹽餘利項下酌量彌補

同治四年九月署鹽政李鴻章札行兩淮運司據湖南督銷局詳據平江縣商人等稟准鹽中有名疆塊安鹽者

卽俗所稱鍋疤鹽惟平江行銷瀏陽次之歷年均向安
豐梁垛何垛東臺富安五場定辦二百年來相沿已久
近奉新章將安豐等五場之鹽概行撥歸江西安徽二
省行銷不准楚湘辦運自當遵照惟平瀏之民於別色
鹽性不喜食商等頗多窒礙乞轉詳爵督鹽憲俯准將
平瀏所需疆鹽一項仍照舊例許赴安豐等場辦運並
勿拘定掣籤次序以順輿情而便商販其餘不在此例
仍照新章辦理似屬公私兩便等情查湖南平瀏民俗
向食淮塊係屬實情應否准其通融辦理乞示祇遵當
經本署部堂批平江瀏陽二邑採茶之人居多因疆塊

便於提攜是以向銷碱片如詳准赴安豐等五場買運
惟原稟勿拘掣籤次序恐致紊亂新章仍應飭令挨次
起運除飭知楚鹽招商局及瓜棧委員外合卽劄司遵
照

同治五年三月湖南督銷局鹽法道翁同龢等酌議湘岸
挂號掣籤章程 一湘岸挂號遵奉鹽院批示將上年
已經收銀及帶資赴揚各商歸入本年春綱提前挂號
掣籤其餘概令繳清每票成本庫平足色銀三千兩並
預納每引釐金銀一兩方准挂號掣籤如有繳銀不足
及用銀票交納者均不開掣其下綱六萬引先繳預釐

存記俟挨號給咨時再令挨次繳銷成本彙解如屆時
繳銀不足將該商名號註銷以杜虛占空號之弊一
各商呈明自將成本雇船赴揚守候給引然究竟到揚
與否無從查悉應由本局咨詢揚州轉運局查明銀船
如已到揚卽由轉運局驗收成本咨覆本局方准提前
掛號一湘岸每年試辦十二萬引所有本年丙寅上
下兩綱運商預繳每票釐金五百兩共銀十二萬兩收
齊後由本局派礮船彙解金陵充餉一掣籤前一日
先將各商姓名分別填籤彌封爲名籤又將每五百引
爲一號填籤彌封爲號籤凡號籤以商名多寡爲斷每

網計一百二十票如商名有一百四十號卽多備空號
籤二十枝餘均依數遞加屆掣籤日在鹽道衙門大堂
將彌封之名籤號籤當堂令各商看明彌封紙色及木
籤長短是否畫一方分兩筒以一筒裝名籤以一筒裝
號籤入筒以後再行羈和將兩筒分東西兩案由本局
司道會同鹽道抽掣當堂拆視令書吏高聲報明某商
掣得第幾號籤某商掣得空籤隨卽填冊並出榜曉示
庶幾共見共聞杜絕弊混 一各商掣得空號者卽於
掣籤後當堂具領將成本釐金原銀檢點發還 一湘
岸認引旣歸湘局挂號如有商販在揚請引者概不准

行方歸畫一但利之所在務期公溥方足以服商情見
今本局酌議寬爲定期於五月初一日先掣上綱六萬
之籤其未經掣得者另期續開下綱照前籤掣一面詳
報鹽院及咨明運司查照一面出示曉諭俾遠近商販
一體周知屆期繳完見銀者一律准其籤掣以昭公允
一商販繳銀均於掣籤之前半月陸續赴鹽道衙門
呈請驗收務須庫平足色由本局雇募錢店商夥看明
平水加蓋斧記以防低僞於掣籤前兩日截止以便核
對商名封籤待掣 一各商挂號應仿照各岸章程出
具的名的保今由局刊刷承運及保人結狀凡認運之

商與認保之人均應照結填入的名毋得仍以某某合
某某公等花名填寫存局備查以昭核實 一商販在
湘繳銀除成本及釐金外所有都營賞號及局費各款
銀兩均令於赴場領票時呈繳以免展轉轆轤 一湘
岸掣籤挂號均應本局會同鹽道衙門認真經理凡丁
差人等均由本局酌給犒賞不准索取分文如有留難
需索情弊准各商立時指名稟究嚴行懲辦 一掣定
之號本局酌定二十號爲一批按照掣籤次第解銀赴
場分給原商辦運但長江二千餘里難保無波濤意外
之虞今經本局酌議每批均令本商各派妥人隨同起

解並由本局移請水師營選派礮船沿途護送以免疏虞 一湘岸距淮甚遠承運各商總以銀船到揚挨次由揚局發票買鹽以免遲誤至到湘行銷仍以船到先後挨輪不得躡越 一淮南產鹽不及曩時之盛各商請運踴躍誠恐各場缺鹽不免守候應由本局咨請運司督飭場商趕緊備辦以資利運 一本年上下兩綱掣定之後不復再招新商至來年開綱時遵照鹽院批定章程祇令本年兩綱及乙丑冬綱各商循環給運 一湘岸掣籤挂號事屬創始所議章程各條誠恐未能周詳盡善見擬試辦一年務期力除弊竇儻或法立弊

生自應法隨弊改另由本局隨時參酌詳辦經署鹽政
李鴻章批准

同治五年正月湖南巡撫李瀚章批湖南督銷局詳查冊
報自同治三年七月十九起至本年六月底止收過局
費平餘等銀二萬七千三百餘兩除全數支用外長用
銀八千八百餘兩尙需別款彌補在試辦之始銷數未
能如額規模未能詳明固係實在情形但每年運銷十
二萬引亦止能提局費三萬六千金該局自應明定章
程方足以經久遠卽如本部院及鹽道衙門辦公岸費
或按月或按引均須酌有定章官之遷調無常設前任

提用後任復提何以應之至總理局務之員其實缺者既有本任廉俸候補者或兼他局薪資亦在應行酌減之列其省局外局用費均以求實用節虛糜爲要今冊報省局年節犒賞五百六十餘串如此之類亦屬過優此後應如何立定章程仰卽妥議併詳核奪又鹽政李鴻章批督銷局詳查江西湖北督銷兩局每局額支活支月需不過二千餘兩該局自三年七月十九起至四年六月底止共用銀三萬六千餘兩之多黃道開支薪水銀六千四百兩尙不在內未免太形糜費湘岸局用前經曾爵部堂批令稟定開支昨准湖南撫部院來咨

亦飭定立章程仰卽趕緊撙節刪減逐款妥議稟候察
奪以昭核實經督銷局道員易潤壇覆稟上年奉前憲
札飭金陵軍餉緊急籌款維艱特於湘省另設鹽局推
廣銷路藉資挹注前司道等均經實力講求盡心籌畫
一宗唐賢劉晏之法引用士流酌給薪水絕不假手吏
胥原期事歸實濟杜絕弊端誠何敢稍涉虛糜上負委
任職道等接手會辦於省外各局薪水雜用等項亦經
再三酌核均係實用實銷尙無浮冒茲奉批示江鄂督
銷兩局每局額支活支月需不過二千餘兩今湘局每
年共支銀三萬六千餘兩原未免太形糜費惟查江鄂

兩省均祇設立兩局已能扼要湘省則南連嶺嶠西通巴蜀鄰私充斥途徑分歧勢不能不多設分局見在省外暨揚州轉運漢口文報共有一十一局是湘省所設之局較江鄂兩省實有五倍之多而每月共支三千餘兩較之江鄂僅設兩局者其用費之多寡已屬懸殊茲據各分局開具薪水清摺前來職道等復將省外局用通盤核計往復會商除撫憲暨鹽道衙門辦公經費及丁役差盤等銀另案詳辦外其餘各項薪水雜用復經逐加裁減摺節開支經鹽政李鴻章批該岸設局較多局用較費尙係實情既據逐加裁減姑准照摺開支惟

每年以運銷十二萬引計算祇收局費三萬六千兩而摺開總數每月已需三千二百餘兩加以該道等薪水及撫鹽兩衙門公費以入計出所短尙鉅似無彌補之術仰仍隨時設法撙節如文案委員每局正副四五名有多至十數名者如可裁汰應行酌刪毋任虛糜湘局總理大員較西鄂爲多則薪水不得不減易道彭道准各月支薪水銀一百二十兩翁道兼任鹽道陸道兼辦釐務均應減半支給以昭平允

同治五年十一月鹽政李鴻章札行湘岸照得督銷局之設專爲革弊興利藉疏銷路俾裕餉源督辦局員責任

綦重必須諸務躬親遇事整頓方有起色近聞湘局諸道並無一人常川晝夜駐局以致局務漸壞銷數日疲弊病百出嘖有煩言而局中糜費倍於西鄂兩岸多虛領薪水並不辦事之人屢經本署部堂屢飭刪減置若罔聞實不可解若再任其自然商本占擱渙散堪虞設竟短釐誤餉試問該道等能當此重咎否本署部堂就訪聞所及將急宜整頓事宜臚列八條 一熬鹽之弊宜革也聞省城見有二百餘戶每戶或設十餘竈及二十餘竈不等將已到淮鹽晝夜開熬始本爲提淨鹽色以便銷售今則偷買鹽滷以及硝鹽包灰之類羈和煎

熬爲害不淺亟應切實查禁違者押閉 一灌漑之弊
宜革也近來省河鹽船每屆輪銷船戶灌漑習以爲常
以致水販赴行買鹽因鹽包受漑甚重棄淮買川者不
一而足無怪銷數益滯夫鹽旣灌漑則燥溼輕重顯而
易見不難立辨應提船戶重責枷號以昭炯戒 一句
串之弊宜革也河干設立巡鹽之人本爲稽察船戶若
輩勾串舞弊是其慣技聞省河巡鹽者每日下午必邀
船戶同入茶館告以翼日到輪預使灌漑凡黃昏黑夜
船戶偷爬盜賣非但不拏反恃巡鹽之人爲護符實堪
痛恨亟應嚴查重懲斥革 一賄縱之弊宜革也湘岸

設立增抽鄰稅各卡本已嚴密上年鄰稅收數較旺淮
鹽售銷不致過滯本年鄰稅極少難保非各卡員得賄
縱放繞越侵灌果有前項情弊察出必須詳參不得稍
涉瞻徇 一該局文報見皆發由驛遞有緊要關軍餉
者可加用排單漢口之文報局竟成虛設亟應裁撤

一岳州設有轉運局平江設有釐金局該兩局皆可兼
顧銷鹽應將岳平兩處所設分銷局分別歸併 一衡
屬向食粵私衡州府城銷鹽甚微又省城總局距城外
河干不及半里起鹽籤籌及每日銷鹽數目可由總局
派人經理應將衡州及省河兩分局酌量裁撤 一湘

岸各局無非人浮於事卽就省局而論上下不下七十餘人而辦事者不過十人亟應大加裁汰各局卡祇准派一正辦不准多立幫辦會辦文案名目每局每卡司事至多不得過四人凡省外各局虛領薪水之人不論官紳一概裁撤以昭核實

同治六年正月湖南督銷局道員陸增祥等詳上年十一月奉憲臺批開查核冊開局用除收支相抵外半年之內已長墊庫平銀一萬餘兩之多較諸鄂西兩局開支幾將倍之實太浮糜目前尙有官運溢鹽餘利藉資津貼轉瞬官運售竣試問作何彌補湘局用費之繁固由

多設分局開銷益大但查開支各項亦儘有可刪之處
卽如各局文案每局飭派一二員已足辦公乃竟有用
至十餘人者本年正月間曾經批令酌刪迄未遵辦不
解何意其中必有終年並不到局按月坐領薪水之人
此外司事人等類皆數人會辦一事人多則費重無怪
入不敷出當此軍餉萬分支絀必須力挽從前鹽務虛
糜積習方能持久歐編修旣辭局差則翁道等責無旁
貸仰卽破除情面力求撙節人之應裁者裁之費之應
減者減之另定開支清摺稟候察辦同日又奉批此項
鄰稅前報摺內除解過銀八萬兩外尙存足錢三萬一

千餘串今又續收足錢二萬一百餘串省平銀二千九百餘兩共計爲數已鉅本署部堂見在督師勦賊年內核計大餉不敷尙多仰卽提錢按照市價易銀連所收銀兩埽數委解金陵支應所兌收限十二月初十以前解到以濟年內急需各局卡半年之內開銷至一萬六千餘串之多費用過大此後應如何核實刪減之處該道等務卽酌減具覆並奉湖南撫憲嚴諭湘岸每年銷數不及十二萬引而薪水局用以及雜費等項多至三萬以外飭令核實裁減以節糜費等因卑局公同酌議以湘岸情形而論上連粵界下連川河多一局分銷卽

多收一處引地勢不能不多設局卡以期協力疏銷以
局費不敷而論亟應大變前章方能逐加撙節茲查揚
州轉運局從前原爲湘岸官運而設見在官運已停其
湘岸商運挂號圓載給咨等事擬仿照西鄂兩岸悉歸
淮南局綜理應請將揚州轉運局裁撤湘商在揚所扣
局費每票二十五兩均由湘岸售竣扣收又漢口文報
局每月搭由輪船專遞文報業已停止見擬稟請刊刻
排單發遞緊要文移以期迅速其督催商船稽查盜賣
等事應卽咨請湖北督銷局查照刊定章程就近經理
卽將漢口文報局裁撤至衡州一局名爲分銷准引其

實爲查緝鄰私而設所有東州耒河均爲抽收鄰稅要卡擬將分銷局裁撤留總管二員文案一員照料兩卡之事又靖江局距省較近而兩岸支河界連甯鄉湘陰等縣屬境水販雲集銷引頗多亦酌留委紳二人分理巡丁三四人薪水局用卽附入省局彙案開報至岳州轉運局久已歸併分銷局辦理此外大小分局本應再議裁撤奈濱湘沅澧支港紛歧鄰鹽在在充斥若撤一局卽失一處淮鹽之利餉源所繫實未便輕議紛更惟有分別裁人務除冗濫以歸實際其留局辦事者自總理以次概行核減薪水通盤綜計每月共支銀一千一

百一十八兩又鄰稅項下每月共支錢一千八百一十七串五百五十文分別開具清單面請湖南撫憲核定自同治六年正月初一日起以後悉照單開支數按季報銷經鹽政曾國藩批前因該局局用糜費急須大加裁汰業將應辦事宜臚列八條札飭實力整理詳候察辦在案該道等未經奉札之先將省外各局酌量裁併員友薪水逐加刪減共計每月支銀一千一百餘兩加以湖南撫部院暨鹽道衙門岸費及該道等薪水并活支之項月共不過二千餘兩當可敷用其抽收鄰稅各卡通年約計亦經裁除萬串有奇辦理均尙核實仰卽

自本年正月爲始查照此次詳定數目按月開支造冊報銷至湘岸官運已停湘販辦運當漸熟習據請將揚州轉運局裁撤歸併淮南總局亦係正辦

同治七年五月湖南督銷局道員陸增祥等詳據商人楊白文等呈稱見在淮綱引地徐徐規復然統計湘岸實銷鹽數不及道光年間銷數三分之一揆厥由來總以川販太多不能盡收復淮之實然如長沙常德岳州等府雖不能盡食淮鹽而所銷尙是川淮各半至若辰州以上則雖有淮鹽引地而數年之中並無顆粒淮鹽能越過桃源者實由灘河險阻淮鹽上駛甚危久成川販

獨收之利商等籍隸上游情形較熟自願各糾夥友合辦淮塊仿照平江辦法專赴辰河銷售以分川塊銷數並不侵占下游州縣引地仰懇轉詳可否賞准給運等情職道等伏查湘岸運鹽自定章後並未續增有案近日銷數亦非甚暢似難於十二萬引之外再議加增惟該商等所稟要係實情請爲憲臺縷晰陳之查湘岸運銷淮鹽僅長沙一府以至岳常澧三屬各口岸而止辰河怪石危灘險甲通省淮鹽不能上駛致令食淮引地全被川私侵灌又其地距省較遠邊鄙時驚凡見在辦運淮商籍貫多附近省會情形隔膜令其轉運入辰莫

不望而卻避卽使強之轉運而該處居民慣食川塊必
令改食淮梁其勢仍不能與川私相敵今該商等旣係
情形熟悉又係專辦淮塊運入辰河此與原定引數銷
路各不相妨而與收復引地增收釐課不無裨益且該
商等旣集重資不能無所營運不羅致以歸淮勢將盡
驅而入川徒爲湘岸樹無窮之敵再四思維不得不仰
懇憲恩俯如所請暫時試辦查辰河以內所食川塊價
在六兩以外淮塊形類川塊價又減去大半當可冀其
必行惟塊鹽銷路與散鹽不同儻官爲監售卽多窒礙
若令商自爲售又恐啟其爭銷搶跌之虞擬令該商等

仿照平江辦法歸總合辦但經運入辰河以上准將應完釐稅全行交納卽便聽其所之庶變通之中仍具條理俟奉批示再行酌議呈核至該商等十二人請引至四十票之多試辦之初難保無壅滯之弊可否裁減十六票每名准其二票約計每月千引循環給運俾資接濟當無缺乏之虞理合詳請示遵經鹽政曾國藩批此案前據該局稟陳大概當以用意甚善批令妥速議稟在案茲據詳商人楊白文等請仿平江辦法另認淮塊專運辰河查各該商大半籍隸辰常兩府自係熟悉該處情形况辰河地勢險遠淮鹽久不到岸此次創辦淮

塊本於湘綱十二萬引之外別開生面於正額毫無占
礙應如所請先准十二商試辦二十四票分別取具保
結仍照眾商認引之例每引先令納釐一兩給咨赴揚
循環轉運其鹽運到岸之後收釐督銷仍歸該局一律
經理其有未盡事宜應卽逐條議稟將來護票內應註
明專銷辰河以上各屬字樣以杜占銷他岸各該屬舊
時引額本屬無多見在專爲敵私起見准認一萬二千
引能否銷足尙無把握昨據揚州轉運局請認之引毋
庸再認以示限制候札淮運司瓜棧暨轉運局黎令遵
照

同治八年十月鹽政馬新貽札據湖南督銷局詳覆蔴沔
汛設卡查驗藉可以杜侵越等情當批此案既經該局
派員會縣確勘蔴沔汛實係辰河地段並未侵占常德
轄境應如所請卽在此處設卡查驗嗣後辰屬碱鹽不
得東越界首常屬尖鹽不得西越蔴沔汛越境均以私
論以清引界而杜紛爭仰候札飭淮運司瓜棧暨湘鹽
轉運局轉諭湘商一體遵照毋得朦混侵越以清界限
而肅鹺規

同治十二年正月湖南督銷局道員白恩佑稟湘省自淮
綱重整以來歲銷迄未足額五六年間可銷九萬餘引

逮至八九等年則銷引僅及六萬無非由川粵兩私上下交侵致成喧賓奪主之勢迨今春奉前憲會奏定分界章程飭於岳常設卡扼堵旋奉前署鹽憲何札飭先將長沙一府粵私禁淨卑局奉文次第遵行約計本歲所銷可符從前九萬餘引之數然其閒堵愈力而徑愈歧緝愈嚴而奸愈出其情形有難枚舉者查川鹽自畫分澧屬行銷後所有常澧分界之南嘴楊閣腦岳澧交界之華容雷灣監利對岸之臨湘鳴關磯等處水口業經分派礮船按段駐劄長艘巨艇已不敢公然闖越但川鹽成本素輕見又減裁釐稅不肖川商行戶每於澧

州及螺山等界肆意囤積招徠販買專與淮引爲敵往
往改用肩挑十數石爲一划數十划爲一路聯翩競渡
伺隙起坡秋冬水涸之時礮船尙易扼口堵緝一經春
夏水漲則汊港紛歧隨處可以登岸其餘桃源陬溪市
華容老鼠尾等陸路則更數百成羣行之若素卑局雖
經酌募陸勇數百擇要扼堵每以眾寡不敵不免此拏
被竄至於粵私則除郴桂兩屬及鄰縣例食粵鹽外其
衡永寶郡竟成久假不歸近至醴安茶攸亦被侵占前
職道等創爲新增票引直抵衡永寶以圖規復之議商
人均以灘逆難行運費無出趲趲不前究之私未得淨

則淮引雖到亦難暢銷而緝粵私又較難於緝川私蓋
粵私成本更輕於川而上游一帶又復多山少水羊腸
鳥道防不勝防非重資勇力亦屬徒勞無補卑局惟遵
札先於長沙府屬之潭醴茶攸鄉安等縣選派紳士酌
帶勇丁前往會同各地方官督飭團保按各都甲責成
協緝卽以報獲私鹽畫半變價充賞並募民販承領淮
引前往接濟寶慶所屬之新化縣亦已仿行數月以來
雖經各船卡陸續拏獲川粵私鹽不少究未能以殺其
勢而絕其迹至於經費向係按引扣提三錢除揚局預
提五分外由卑局補提二錢五分以爲局用前以不敷

支銷奉文將局中薪糧等項大加裁汰並准以後在於所收鄰稅項內動支彌補惟自三月內裁撤岳常川稅九月內停止石灣粵稅每年入款較往年僅得十之一二而添設各處堵截用費每年出款較往年數倍加多當此入不敷出既不能將卡船裁減又未便將釐課動支除非籌之於商此外別無良策但仍按票加提又恐有疲商力見經飭諭眾商集議務求有濟於公而無損於商乃爲盡善

同治十二年閏六月湖南督銷局道員孫翹澤稟查疏銷以緝私爲先緝私以經費爲重淮綱重整以來奉定局

費按引扣提銀三錢其時各局並無礮船歲銷亦在七八萬引上下局用支報尙屬有絀無盈幸賴鄰稅一項奉准動支彌補迨前年譚升司稟設岳澧稅卡增設礮船未及一年卽奉奏分川淮界限旋又奉飭先禁長沙一府粵私卑局次第扼界堵緝停止岳常一帶川稅並停止石灣局落地粵釐於是入款大減出款倍增銷引雖較多於前實有入不敷出之勢上年葉道曾將情形稟明前憲鑒察一面飭諭各商籌議一面仍賴征存鄰稅尾數及續收澧衡兩處稅項支用以故自上年五月開辦堵緝以迄於今雖不無一兩月欠發之款尙不致

有掣肘之虞洎職道上月抵局清查鄰稅存數既已儘支無餘而各商所籌雖有每票捐銀二百兩營運生息之舉尙因眾商渙散一時驟難繳齊及核計每歲支款除撫署鹽署公費及揚州局並各岸督銷分局額支外所有新設各處船卡雖經葉道於冬春之間酌量裁汰見計岳卡每月尙需八百餘串文常卡月需二千一百餘串文華容卡月需八百餘串文龍山卡月需三百餘串文石灣卡月需二百餘串文其餘湘鄉湘潭新化等處共需四五百餘串文以上年所銷九萬引提存局費入數扣抵出數計每年至少約尙短銀四萬兩有奇見

在澧州稅局奉撤尙未復設衡州大陂東洲兩局稅項
近今不過月收四五百串而各處卡船請領薪糧業已
陸續踵至無米與炊實深焦灼職道再四思維竊以見
當緝私喫緊需費孔亟之時各處船卡旣難撤裁而正
款又無動支之理非仍籌之於商難期有濟惟各商前
擬按票捐銀營息之議似屬緩不濟急且恐所籌息銀
仍難按年敷用究應如何籌濟俾有益於公無損於商
之處容俟黃道到局後會商妥定詳請核辦經鹽政李
宗義批該局出款太繁所提局用每引三錢不敷支放
係屬實情惟每年約短四萬兩有奇爲數過鉅自宜力

求撙節並月籌有著之款方能持久該道所稱非仍籌之於商難期有濟舍此殊無他策上年曾經葉道諭商籌議迄未議定仰卽再督飭各商通盤核算迅速妥籌稟候察辦一面將有可裁減之處量加刪汰少一分虛糜自多一分實用也

同治十二年八月湖南督銷局道員孫翹澤詳卑局前因經費支絀當經飭諭岸商妥籌茲據湘商值年謙泰升等稟稱案奉憲諭以緝私經費支絀飭商另議切實有著之款按季解繳商等查湘岸自上年分界扼堵各處船卡用費日增憲局入款有額自不能不由商等籌解

但近來商等苦累情形久邀洞鑒驟繳巨款實力有未
逮見在商等公同集議擬仿局費章程按引捐銀三錢
計每票共銀一百五十兩各於起咨時隨同預釐解繳
仍陸續發交商等具領由商等按季彙解以供支放第
每歲所提銀數之多寡惟視銷數之暢滯以爲衡其中
盈絀商等未敢逆計擬請先行試辦一年不敷之時自
應設法另籌如有盈餘當隨時稟請酌減並請將本年
正月以後起咨各票已繳一次捐項庫銀二百兩內各
給還五十兩餘卽作爲此次捐款以免緩不濟急查卑
局經費除局用支銷外約短四萬兩有奇職道曾將常

德華容石灣等處費用酌量核減每月約少六百餘串
文見奉批飭刪汰自應再加察看力求撙節惟查見在
鴨闌磯卡經費較前稍增轉瞬復設花畹岡局奉飭經
費由局另籌以此相准似每歲所短仍在四萬兩以外
見據該商等擬定按引提捐三錢以上年暢銷之九萬
引核計每年所提不過二萬七千兩仍有不敷之慮但
商人近來較前苦累亦係實情舍此旣別無可籌自不
能不暫爲遷就該商等擬請試辦一年將所提之銀陸
續發出按季彙繳無非爲籌補不敷地步見已經卑局
批飭照辦如果用有盈餘准隨時察看酌減設籌補後

再有不敷另當請示核辦經鹽政李宗義批允

謹按湘省局用經費每引前已捐過三錢茲再捐三錢共計六錢

同治十二年十二月湖南督銷局道員孫翹澤稟查湘省運引二百八十四票除平辰專岸外向設本城湘潭益陽靖江新市常德岳州七岸分局派銷從前歲銷雖未足額曾報銷九萬餘引嗣遞減至六七萬引上年葉道設法推廣派人赴湘鄉設局由潭岸撥銷又赴新化設局由益岸撥銷又赴華容臨湘設局由岳岸撥銷其湘陰向有一局由靖江撥銷安化則招令水販由益局提

銷銷數雖微立法頗善職道到局踵行力加整頓或責成都總或責成行戶按月領售酌定繳價限期見計湘鄉月銷已及一票臨華兩局近亦漸銷百餘引其餘各岸督飭在事員紳極力疏導常益靖等局均月銷三兩票不等計自六月起至十一月底止共銷六萬引有零連五月以前銷數合計已銷去九萬七八千引見距封稱不遠年下銷市向更暢旺統計本年銷數已在十萬引以外岳常辰永一帶均與川私水陸接壤而粵私下灌直逼長境必須先緝水路以清其源見在鴨關磯地面會合北局設卡經局派設礮船十號挨段堵巡復稟

奉湖南撫憲調派巡防營岸勇二百名選鋒營舢板五號協緝所有臨湘岳州新市平江等處可免侵灌華容城河及雷灣永固垸等處派撥礮船三號並另雇巡船六號分劄堵緝以扼太平口一帶川船入湘要路又於常澧交界之南嘴西港楊閣腦新安橋等口派玉字營礮船十一號駐緝以固常岸門戶該處夏秋水漲湖面甚寬曾稟奉湖南撫憲添撥常安營舢板幫巡水退業請調回其常德近城後河及龍沅一帶另派礮船五號梭巡並於陬溪市育德鋪各處設立分卡以固常岸腹地又於永順屬之龍山駐船二號扼堵以防川私由來

鳳卯洞下侵至於粵私自奉文將石灣改爲緝私局後
派有礮船二號扼堵潭局亦有礮船一號梭巡使鹽船
不得直達潭境其餘益陽靖江新市等局均經設船坐
巡另雇巡船一二號隨時在於各岸支河汊港常川遊
巡以補各局耳目之所不及此外一切零星小卡陸勇
分別酌量撤減以免紛擾至鄰稅一項自川淮分界後
復經核減抽收已屬無多此次奉文復設花畹岡卡並
於東壩口青石牌設立分卡開辦之始曾設礮船二號
前往以資查驗並調撥玉字營常德局礮船二號暨稟
奉湖南撫憲調撥常德營勇四十名暫駐防護查見在

川鹽僅銷澧州一屬前此夏秋水泛商船儘運入境囤積值此冬令水涸來船已稀然自九月二十一日開卡起至十月底已據報收稅錢六百餘串明春水漲船多稅項必更有起色其衡州粵稅從前東洲卡收數最旺近則商販悉改肩挑繞越而行致大減色惟耒河卡移設大陂市後每月收數常可數百串職道竊查抽收鄰稅原屬權宜之舉見經督飭東洲大陂兩卡委員認真查驗覈實抽收並常川派勇附近梭巡以防侵越至各局冗人均經查明裁撤並明定章程大局幫辦五人中局幫辦三人小局幫辦一人以示限制至局用經費額

提每引三錢尙多不敷全賴鄰稅動支彌補自上年分界停稅增設卡船費用愈形支絀曾稟奉批准每引暫行加提三錢但查局中支用原數每月銀錢並計約需六千餘金其各礮船隨時修理尙不在此數茲照加提之數以歲銷至暢之十萬引核算每年尙短萬餘金綜計先後裁減華容局每月三百餘串常德局每月一千餘串龍山局每月一百餘串揚州湘岸局每月二百餘兩此外零星節省每月約一二百串以錢計銀一年統共省去銀一萬餘兩加以鴨關磯花畹岡兩卡新增支款出入相權雖尙不敷已不致大相懸絕將來入數或

減出數或加均難預定幸眾商前議加提原稟曾聲請
陸續發出按季彙繳以爲營運彌補之計尙可無慮短
絀再查花畹岡卡需用經費每月額支錢三百串文其
開卡以前預領銀三百兩見據開報買修卡屋及添置
什物尙須找給錢二百餘串文復據稟俟春水漲發察
看情形擬於梅金窖晃湖寺增設分卡似此支款又須
酌加核計該卡每年經費不下四五千串見在該卡復
設未久收數無多自不能不由局撥款墊發但局中經
費入少出多見在已形支絀經久更難爲繼將來水泛
稅旺之時可否援照前案將該局用費歸入坐支報部

核銷之處伏候酌奪經鹽政李宗羲批花畹岡經費每年約需錢四五千串局中難以爲繼自係實情惟卡用一經報部恐干駁詰礙難奏咨目前祇可由局給發仍俟將來收稅能旺或酌留一二成作爲卡用由外核銷亦無不可

光緒三年五月湖南督銷局道員李鎬等詳長沙府屬之甯鄉縣係淮鹽引地該處水道以靖江爲門戶自靖江設局後歷年以來由該縣商人赴靖販運淮鹽前據署甯鄉縣唐令步瀛稟據該縣職員李芳圃等稟稱甯邑輾轉販運閒有羈雜泥沙等弊諸多不便貿鹽之戶均

因虧累貲本率皆歇業需鹽孔亟請設局試行等情職道當卽派委候補知縣汪令曾復前往會同該署令暫行設局試辦一面飭令省河分局暨靖江局就近酌撥上色引鹽陸續運往以資接濟擬於撥檔時挨定次序並於銷竣後酌提津貼充淮商公局之用則先銷者息非過厚後撥者咸靜以待輪查省外窮鄉僻地向就近分局撥鹽者舊有提撥尾檔辦法較其所獲餘利與所費水腳亦無甚便宜今甯鄉設局伊始舊無寸引存積隨撥隨銷獲利較速靖岸各商以有提撥尾檔成式在前互滋猜議慫恿撓阻各逞其說因飭淮商局公同妥

議期於斟酌盈虛毋使苦樂大判低昂旋據集議稟稱
請以靖江省河兩局存岸之鹽從第十票開提是居首
檔者固無忌無猜而居尾檔者亦漸推漸近尤昭平允
而免覬覦至提甯之鹽隨撥隨售以視存岸之鹽待檔
待銷遲速既殊卽盈虛各別請仿照行用按五百引數
每票抽提經費三百兩歸商局收管仍以資靖岸彌補
銷戶逃亡虧倒等項之用經鹽政沈葆楨批允

光緒五年九月湖南督銷局道員李鎬詳據值年淮商稟
稱同治十二年閒川淮分界其時鄰稅停收局用支絀
商等不得已因公籌經費仿照局費章程按引捐銀三

錢隨同預釐呈繳仍陸續發交商局按季彙解以供支
放當孫前局憲立案時係照歲銷九萬引以爲衡其公
費之加減仍視銷數之暢滯以爲斷近年以來歲銷多
及十萬去歲所銷增至十二萬引昨已公同結算計自
同治十二年起至光緒五年五月止所收公費每歲除
照九萬引分月呈解外尙餘銀一萬一千八百餘兩此
項公費尙無虧短等情職道查卑局開辦之初每引提
公費銀三錢以充局用因支放不敷奉准在於川粵鄰
稅項下動支嗣因不准鄰鹽入境飭令各分局一律停
收鄰稅於是淮銷漸暢而局用大絀同治十二年七月

聞奉前憲李批定每引加收銀三錢每票共收銀一百五十兩是爲籌補公費其時歲銷約九萬引計可收銀二萬七千兩於局用仍慮不敷議將所收之銀發該值年淮商經收按季彙解進局以供支放如有不敷仍由商局籌補足用並聲明如果用有盈餘准隨時察看酌減等情在案近年銷數較暢此項所收較多而局用則力求撙節從未於額外溢取絲毫擬留此盈餘閒款以備緩急意外之需經署鹽政吳元炳批此項公費准免二分將來儻有不敷仍應照案由商籌補

兩淮鹽法志卷七十五

兩淮鹽法志

卷七十五

督銷門

湖岸督銷上

完